

Gia scrivin nus igl onn 2015, igl onn 2014 s'auda tiel vargau, con spert ch'il temps passa. Ei ha num da mirar anavos e dar giu plaid e fatg per mauns dalla fundaziun. Per mei ei quei buc mo in'obligaziun birocratica e schetga, mobein ei dat a mi la caschun da reflectar nossa lavur. En mes plaids che jeu drezzel a Vus, vi jeu bugen schar reviver in per bialas acziuns. Nos giuvenils ein las persunas principalas da nossa lavur. Jeu enconuschel bia grondius giuvenils ella Cadi. Nus savein esser cuntents e loschs dad els. Las medias publicheschan savens che giuvenils seigien empau drogai, memia marschs da luvrar, violents e laschien tut la miarda giun plaun. Clar, da quels dat ei era, schizun denter nus, era ella Cadi dat ei buc mo pulits. Cun plascher sai jeu dir che las nuorsas neras ein l'exepziun, si cheu tier nus.

Schegie ch' jeu sun per mes giuvenils en ina vegliadetgna sco Metusalem ed jeu sun parallel aunc involvada cun la scola, han els in bien contact cun mei. Ei va pli tgunsch da baghegiar si ina buna relaziun da confidanza cun ils giuvenils, els ch'ei mes clients, sch'ei dat in liug da sentupada el vitg. Leu san ins sedar giu cun collegas, culs menaders e sch'igl ei giavischau gest contactar mei. Il venderdis sera mondel jeu sin turnea, quei vul dir che jeu visetel mintga local per in'uriala. Survigilanza fan ils menaders ed els procuran per program dalla sera.

Il Forum cultural internaziunal Mustér ha organisau 2014 differentas occurenzas duront siu project „Inscunter culla cultura africana“. Nos giuvenils ein sengaschai en quei project cun preparar e survir in aperitiv. Ils inscunters han giu liug mesjamna ils 8 da schaner a Mustér ed ils 8 da mars a Sedrun.

Ils 18 da schaner essan nus seradunai a Mustér sin la patinera. Ils giuvenils han giu grond tschaffen da dar hockey e guder il suentermiezdi. Naturalmein ha era zatgei cauld da beiber ed ina buna petta buc astgau muncar.





Il 25 da schaner havein nus saviu porscher in luvratori (workshop) tut special a nos giuvenils. Gimma, igl enconuscent rapper national, e nies rapper local Giganto, han mussau co ins metta ensemen in text da rapp e presenta lu quel al publicum. Grond plascher ha fatg a mi ch' in giuven dalla Lumenzia ed in da Versomi ein vegni a Trun a quei luvratori.

Il 10 da matg ha il mir enta Dieni survegniu in niev graffiti. Ensemen cun ils meinacuors Florian Märchy e Marco Bigliel han ils giuvenils astgau „far il sprayen“ da novamein la preit dil sutpassadi da skis. Uonn havein nus giu viseta e controlla dalla polizia, per cletg havein nus adina las lubientschas necessarias, aschia che quei ha dau negins problems.



Sonda, il 17 da matg, havein visitau ils pumpiers da Mustér. Auter ch'igl alarm e la cazzola blava havein nus astgau scuvierer quasi tut duront quei di. Il giuven, giuvenas ein deplorablamein buc separticipadas, han saviu exercitar co agir en situaziuns seriusas, aschia sco quei ch'ils pumpiers activs fan. Quei vul dir agir correct e spert tier in barschament, salvar zatgi ch'ei sefatgs mal zana ella muntogna ni deliberar ina persuna ord in auto.

Il giuvenils da Tujetsch ein semussai activs per vuler cumprar novas boxas per lur local da sentupada. Il geniturs dils acutals visitaders havevan probabel installau quellas boxas avon onns. Novas e „vor allem“ bunas boxas cuostan dabia. Cun la vendita da muffins, ch'ils scolars han fatg e repartiu, han els recaltgau 1800.- frs. Dalla vischnaunca da Tujetsch han els survegniu ina donnaziun da 1000.- frs. Aschia che nus havein saviu cumprar boxas ed in niev „mischpult“ en uorden. Igl atun ein las boxas cun agid e cussegliaziun da Gieri Spescha vegnidas installadas.





Ils 31 da matg havein nus astgau guder ina biala e strentga sonda el Parc Medelin cun reiver sur divers parcours, schar ballontschar sul Rein vi ni cun sesgarflar d'in grep siado. Las giuvnas ed ils giuvens ein semussai detg inschignus ed han gudiu quella excursiun. Bien engraziament als menaders da Alpventura per il segirar ed instruir bein. Suenter las

strappazas havein gudiu ina grillada a Fontanivas.

Il zercladur havein giu viseta dad ina giuvna ed in giuven dad Uruguay. Els sengaschan en lur patria per la giuventetgna ed ein stai fetg interessai vid nossa lavur, nos projects e nossa cultura.

La primavera ed igl atun havein nus organisau, sin giavisch dad ina gruppa da giuvens fans da mopeds, in parcour ed ina cuorsa da velos e mopeds. L'aura ei stada favoreivla omisdus datums, era per grillar sin la piazza da giug ad Igriu. La firma Beer surlai a nus gratuitamein igl areal per quei parcours. Il Torino e siu fegl Arno metta mintgamai a disposiziun gratuitamein material per marcar la pista, engraziel fetg!



Aschigleiti che la scola ha entschiet igl uost, sundel jeu sepresentada als scolars ed allas scolaras dil scalem superiur en l'entira Cadi. Cun ina presentaziun haiel declarau ad els la lavur da GIUVNETETGNA CADI e fatg attents els sin nossas purschidas.



A caschun dil lotto da benefeci en favur dalla scola professiunala dil project Mbara Ozioma ein zaconts giuvenils sedeclarai prompts da segidar. Ina sonda essan serendi naven da Tujetsch tochen Cuera e Lenzerheide a pender ora placats. Igl ei stau in plascheivel di cun ina buna pausa da miezdi a Glion. La sera dil lotto ein mo paucs giuvenils stai prompts da segidar cun survir ni

puttar cartas e chips allas meisas da lotto.

Duront las vacanzas d'atun havein nus saviu porscher a nossas giuvnas il cuors Wen-Do da seriscuder e prevenziun. Igl onn 2013 ha la Pro Juventute Cadi ensemen cun Agid da SIDA Grischun organisau il cuors per buobas dil scalem primar. Nus havein vuliu menar vinavon la secunda etappa per giuvnas dil sclaem superiur. Deplorablamein ein mo tschun giuvnas, e tuttas entschevidras, s'annunziadas. Denton ein las menadras professiunalas sedeclaradas promptas da tuttina menar atras il cuors sco previu. Las giuvnas han aschia saviu profitar da coaching individual.



Ellas sco era las menadras ein sesentidas fetg bein e stadas satisfatgas dil cuors. Sco carta da reclama ha Holla Basilea (purschida da formaziun per dunnas e buobas) dumandau nossas giuvnas d'astgar duvrrar lur fotografias per sujet, quei fa naturalmein grond plascher.



Ils 19 da november ha la giuvna Claudia Cathomas da Tavanasa mussau a giuvnas co tractar bein las unglas. Claudia meina in studio da cosmetica a Tavanasa. Las giuvnas han empriu da far ina massascha da mauns, glimar correct las unglas e la meinacuors ha declarau tgei ch'ei trendig. Secapescha che tuttas han astgau colurar las unglas suenter lur gust e taccar si maletgs da

fluras, steilas ni schiglioc fittems.

Ils venderdis sera ein ils differents locals da sentupada aviarts. Ils menaders sesprovan da far pintgas activitads ensemen cun ils visitaders tenor il principi participativ. Quei vul dir, ils visitaders ston sengaschar e segidar. Quei ei magari buc aschi sempel, biars da nos giuvenils ein pil pli programai sin consumar.

Miez december essan nus sedecidi da serrar ad interim il local da sentupada a Trun. Il motiv ei ch'ils visitaders mauncan. Nus havein giu in tec la speranza ch'il di dallas portas aviartas a caschun dil bazar dalla Casa Depuoz il december, carmali forsa in ni l'auter visitader. Quei ei denton buc stau il cass, aschia che la consequenza ei stada da serrar per ad interim quei local. Ils

**il local da giuventetgna  
a Trun**

**resta serraus naven  
dad immediat**

**COMUNITA  
ZUS  
E** Esplai informaziun serviziu tier: Gabriela Calucan-Lundbieri  
tel. 081 936 31 91  
num. 079 922 09 12  
mail: info@giuventetgna.ch

scolars e las scolaras dil scalem superiur da Sumvitg-Trun van ensemen a scola a Trun. Ils giuvenils da Trun prefereschan el mument dad ir ils venderdis sera el local a Surrein. Quei ch'ei gie era bien che giuvenils ein prompts da separticipar ad activitads che sesanflan sur l'atgna seiv o. Ils menaders ch' eran sengaschai per far survegionza ein momentan senza occupaziun.

GIUVNETGNA CADI ei in project dalla fundaziun Tür auf – mo vinavon en favur dils giuvenils sin incumbensa dallas vischnauncas dalla Cadi. La cumissiun dalla lavur da giuvenetgna secumpona ord representants da mintga vischnaunca. Nus sentupein 6 tochen 8 gadas ad onn per discuorer sur dil curriu e passau, per decider davart las finanzas e projects. Il fenadur ha nies premurau Baseli Berther da Tujetsch abdicau da siu post sco president dalla cumissiun. Cun Madlen Deflorin-Spescha da Mustér havein nus anflau ina dunna engaschada sco presidenta da nossa cumissiun. Bien engraziament ad els omisdus.

L'entschatta mars ha Olivia Pfister entschiet ella piazza da secretaria. Nus selegrein che la dunna simpatica e versada da Trun s'auda tier nies team.

Cun in sincer engraziel fetg a tuts che sustegnan nus,  
per GIUVNETGNA CADI, Gabriela Cabalzar-Lombriser